

NKANDA WANTETE WA MOSE VO NGENESI¹

KAPU 1

Nsemono azulu ye ntoto.

1 Muna mbadukulu Nzambi wase-
ma zulu ye ntoto.

Nk. 33: 6. 90: 2. 104: 2. 136: 5. Yoa. 1: 3.
Kol. 1: 16. Eb. 11: 3.

2 Ntoto wakala wavombila ye wa-
nkatu, tombe kiakala va luse luansi-
na, ye Mpeve a Nzambi yavevila va
ntandu aminlangu.

3 Nzambi wavova: Bika kia kwa-
kala; kia kwakala. 2 Kol. 4: 6.

4 Nzambi wamona vo kia kwakala
kwambote; Nzambi wavambisa kia
ye tombe.

5 Nzambi wabika nkumbu akia
mwini, wabika nkumbu atombe fuku.
Nkokila yakala, ye nsuka wakala, i
lumbu kiantete.

6 ¶ Nzambi wavova: Bika luya-
lungunu luakala va kati daminlangu,
ye bika luavambisa minlangu ye
minlangu. Yel. 10: 12. 51: 15.

7 Nzambi wavanga luyalungunu,
wavambisa nlangu miakala ku nsi alu-
yalungunu mu nlangu miakala ku
ntandu aluyalungunu; bwakala bobo.

Yes. 40: 22. 42: 5. 44: 24.

8 Nzambi wabika nkumbu aluya-
lungunu zulu. Nkokila yakala, ye
nsuka wakala, i lumbu kiansole.

9 ¶ Nzambi wavova: Bika niangu
miena ku nsi azulu miakutakana va
vuma kiavanguka; bika nsi yayuma
yamonika; bwakala bobo. Nk. 33: 7.

10 Nzambi wabika nkumbu ansi
yayuma ntoto, wabika nkumbu alu-
kutukunu luaminlangu mimbu. Nza-
mbi wamona vo bwambote.

11 Nzambi wavova: Bika ntoto wa-
buta bititi, titi bibutanga mingidi,
nti miandia mibutanga mbutu bonso
bwenina makanda manti miena mi-
ngidi mu miau kibeni va ntoto; bwa-
kala bobo.

12 Ntoto wabuta bititi, titi bibuta-

nga mingidi, bonso bwenina makanda
mabiau, ye nti mibutanga mbutu
miena mingidi mu miau kibeni, bonso
bwenina makanda mamiau. Nzambi
wamona vo bwambote.

13 Nkokila yakala, ye nsuka wakala,
i lumbu kiantatu.

14 ¶ Nzambi wavova: Bika kia
kwakala mu luyalungunu luazulu mu
vambisa mwini ye fuku, ye bika kwau
kwakala dimbu biansungi ye bialu-
mbu ye biamvu; Yel. 31: 35.

15 bika kwau kwakala kia mu
luyalungunu luazulu mu kienzudila
ntoto; bwakala bobo.

16 Nzambi wavanga kia kole kwa-
kunene; kia kulutidi mu nene mu
yala mwini, ye kia kulutidi mu ke mu
yala fuku; wavanga zimbwetete mpe.

17 Nzambi watula bio mu luyalu-
ngunu luazulu mu kienzudila ntoto

18 ye mu yala mwini ye fuku ye mu
vambisa kia ye tombe. Nzambi wa-
mona vo bwambote.

19 Nkokila yakala, ye nsuka wakala,
i lumbu kiania.

20 ¶ Nzambi wavova: Bika nlangu
miazala kwa lekwa biabingi biena
moyo; bika nuni zatilumuka va nta-
ndu antoto ku nsi aluyalungunu
luazulu.

21 Nzambi wasema mbizi zazinene
zambu ye biabio biena moyo biki-
banga ye bifunananga beni mu mi-
nlangu, bonso bwenina makanda
mau, ye nuni zazo zena maveve,
bonso bwenina makanda mau. Nza-
mbi wamona vo bwambote.

22 Nzambi wasakumuna bio, wa-
vova: Lukala lubutu, lufunana ye
lufuluza nlangu miambu; bika nuni
zanieka va ntoto. 1 Mose 8: 17.

23 Nkokila yakala, ye nsuka wa-
kala, i lumbu kiantanu.

24 ¶ Nzambi wavova: Bika ntoto
wabuta bulu biena moyo, bonso
bwenina makanda mau: biatoluka,

¹ mbangudulu: Nkand'a Tuku (kiatukila lekwa biabio).

bizanzalanga ye biamfinda, bonso bwenina makanda mau; bwakala bobo.

25 Nzambi wavanga bulu biamfinda, bonso bwenina makanda mau, biatoluka, bonso bwenina makanda mau, biabio bizanzalanga va nsi, bonso bwenina makanda mau. Nzambi wamona vo bwambote.

26 Nzambi wavova: Bika tuavanga bantu mu kifwani kieto, mpasi bafwanana ye beto, bika bayala mbizi zambu, nuni zazulu, bulu biatoluka, ntoto wamvimba ye biabio bizanzalanga va ntoto.

Nk. 8: 5. Eb. 2: 7.

27 Nzambi wasema muntu mu kifwani kiandi, mu kifwani kia Nzambi kansema. Yandi wabasema bakala ye nkento.

1 Mose 9: 6. Ef. 4: 24. Kolo. 3: 10.

28 Nzambi wabasakumuna; Nzambi wavova kwa bau: Lubutana, lufunana, lufuluza ntoto ye luyala wo, luyala mbizi zambu, nuni zazulu ye bulu biabio bikibanga va ntoto.

29 Nzambi wavova: Tala, mono iluveni titi biabio biena mingidi biena va ntoto wamvimba ye nti miamio mibutanga mbutu miena mingidi; biobio i madia meno.

1 Mose 9: 3.

30 Kwa bulu biabio va ntoto, kwa nuni zazo zazulu ye biabio bikibanga va ntoto biena mwela wamoyo, kwa biau mpeni titi biabio biankunzu mu dia. Bwakala bobo.

Yes. 11: 6.

31 Nzambi watala biabio bikavanga, ye tala, biakala biambote beni. Nkokila yakala, ye nsuka wakala, i lumbu kiansambanu.

KAPU 2

1. *Lumbu kiansambodia. 8. Lumbu lua Edeni.*

18. *Mpangulu ankento.*

1 I bobo bwamana vangulwa zulu ye ntoto ye nkangu au wawo.

2 Mu lumbu kiansambodia Nzambi wamanisa mavanga mandi makavanga; yandi wavunda kiansambodia mu mavanga mandi mamu makavanga.

2 Mose 20: 11. 31: 17. 5 Mose 5: 14.

Eb. 4: 4.

3 Nzambi wasakumuna lumbu kiansambodia, wabieka kio, bu kavundi la kio mu mavanga mandi mamu makasema ye vanga.

4 ¶ Nsamu wowo i wambadukulu amazulu ye ntoto, bu biasemwa mu

lumbu kiavanga Yave Nzambi ntoto ye mazulu.

5 Buna va ntoto ka vakikadila nti nkutu ko, ye titi ka biakimenina mu nsi ko, kadi Yave Nzambi kakino-kisina mvula va ntoto ko, ye ka vakala muntu mu sadila ntoto ko.

6 Kansi mu ntoto mwatuka mbungi watombuka ye wanoka va ntoto wamvimba.

7 Yave Nzambi wavanga muntu mu mfumfuta zantoto, wavela mwela wamoyo mu mbombo andi, ye muntu wayika mwela wamoyo.

1 Kol. 15: 45, 47.

8 Yave Nzambi wakuna lumbu¹ mu Edeni mu ntini yaeste, ye muna katula muntu ukavanga.

9 Yave Nzambi wamenisa nti miampila zazo mu ntoto, miantoko mu tala ye miambote mu dia, ye nti wamoyo mu kati dialumbu ye nti waluzailu luabiambote ye biambi.

10 Mu Edeni mwavaikila nzadi yavana nlangu mu lumbu, tuka muna yau yakabana mu nzadi ziia.

11 Yantete yena nkumbu Pisoni; yoyo yizunganga nsi yamvimba ya Havila yena wola.

12 Wola wansi yina wena wambote, muna mwena bedeliumi ye tadi diaonisi.

13 Nzadi yanzole yena nkumbu Ngihoni; yoyo yizunganga nsi yamvimba ya Kusi.

14 Nzadi yantatu yena nkumbu Hidekeli; yoyo yikwendanga ku este dia Asilia. Nzadi yania i Eufalata.

15 Yave Nzambi wabonga bakala, wantula mu lumbu lua Edeni, mpasi kasadila lo ye keba lo.

16 Yave Nzambi wakamba bakala, wavova: Ngeye lenda dia mbutu miawonso wonso nti mu lumbu,

17 kansi mbutu mianti waluzailu luabiambote ye biambi, kudiani mio ko, kadi lumbu kiuna mio dia, fwa si wafwa.

18 ¶ Yave Nzambi wavova: Ka bufweni kwa bakala mu kala kinsona ko, ngina kumvangila nsadisi ufwanane ye yandi.

Mpovi 4: 9.

19 Mu ntoto Yave Nzambi wavangila bulu biabio biansi ye nuni zazo zazulu, ye yandi wanata bio kwa bakala mu tala bonso bukana bio vana nkumbu. Yonso nkumbu yavana bakala kwa bulu bulu kiena moyo, yoyo i nkumbu abulu.

¹ bonde, voka.

20 Bakala diavana zinkumbu kwa bulu biabio biatoluka ye kwa nuni zazo zazulu ye bulu biabio biansi. Kansi kwa Adami ka kwamonika nsadisi ufwanane kwa yandi ko.

21 Yave Nzambi wabwisa bakala tulu tuangolo ye, bu kaleka, wabonga visi kialubanzi ye wavingisa nsuni vakala visi.

22 Yave Nzambi wavanga nkento mu visi kialubanzi kikabonga mu bakala, wannata kwa bakala.

¹ Kol. 11: 8. ¹ Tim. 2: 13.

23 Bakala diavova : Keti yandi i visi kiavisi biami ye nsuni ansuni ami. Yandi una bikwa nkento, kadi wabongolo mu bakala.

24 I bila bakala si kasisa s'andi ye ngudi andi ye tatamana ye nkazi andi, ye bau bana kala nsuni umosi.

Mat. 19: 5. Mal. 10: 7. Ef. 5: 31.

25 Kansi bakala ye nkazi andi bakondwa nlele bau bole, ye ka bamona nsoni ko.

KAPU 3

¹ Adami ye Eva bavola masumu. 8. Basembwa kwa Nzambi.

1 Kansi nioka yalutila bunkita mu bulu biabio biansi biavanga Yave Nzambi, ye yau yavova kwa nkento : Kamba, Nzambi wavovele vo : Beno ka luna dia mbutu mianti miamio mu lumbu ko?

Yoa. 8: 44.

2 Nkento wavutula kwa nioka : Beto tudiana mbutu mianti miena mu lumbu,

3 kansi mu mbutu mianti wena muna kati dialumbu Nzambi wavovele : Beno ka luna mio dia nkutu ko ye ka luna mio simba ko, ka luidi fwa.

4 Buna nioka yavova kwa nkento : Ka luna fwa nkutu ko ;

5 kansi Nzambi zeyi vo kionso lumbu kiluna mio dia meso meno mana zibuka, ye luna kala bonso Nzambi mu zaya mambote ye mambi.

6 Nkento wamona vo nti wakala wambote mu dia, wantoko mu tala ye wazolakana mu vana nduka ; yandi wabonga wo mbutu, wadia wo, wavana mpe kwa bakala diandi diakala yandi, ye yandi wadia wo.

² Kol. 11: 3. ¹ Tim. 2: 14.

7 Buna meso mabau bole mazibuka ye bamona vo ka bakala ye nlele ko ; batunga makaya makuyu mabaki-vangila nlele mialuketo.

8 Bau bawa nding'a Yave Nzambi

wazieta mu lumbu mu ntangu anko-kila. Bakala ye nkazi andi baswama zizi kia Nzambi va kati ye nti mialumbu.

9 ¶ Kansi Yave Nzambi wabokila bakala, wavova kwa yandi : Kwe wena?

10 Yandi watambudila : Mono agwilu nding'aku mu lumbu ye ntinini, bu nkondolo nlele, i diau nswemi.

11 Buna yandi wavova : Nani uku-zaikisi vo kwena nlele ko? Didi kwaku mbutu anti uyakukembi, vo kuna wo dia ko?

12 Bakala diavutula : Nkento uwapeni mu kala yami umpeni mbutu anti, ye ndidi wo.

13 Buna Yave Nzambi wavova kwa nkento : Nki adiambu diodio diuvengi? Nkento wavutula : Nioka yimpunini, ye ndidi wo.

14 Buna Yave Nzambi wavova kwa nioka : Bu usidi bobo, singwa una singwa mu bulu biabio, bulu biatoluka ye biamfinda ; ngeye una diatila mu vumu kiaku ye una dia mfu-mfuta zantoto lumbu biabio biazingu kiaku.

15 Mono ngina tula kitantu va kati ye ngeye ye nkento, va kati ye nkun'aku ye nkun'andi. Yandi una kosikisa ntu aku, ye ngeye una kunta mu kinkoso kiatambi kiandi.

Loma 16: 20. Eb. 2: 14. ¹ Yoa. 3: 8,

16 Yandi wavova kwa nkento : Mono ngina kumwesa miangala miangolo, bu wena ye vumu ; una buta bana baku mu nsongo. Kansi luzolo luaku luna kala kwa bakala diaku, ye yandi una kuyala.

Ef 5: 22.

17 Yandi wavova kwa Adami : Bu udimbidi mambu mankazi aku ye didi mbutu anti uyakukanikini : Kuna wo dia nkutu ko, i kuma ntoto una singwa mu diambu diaku. Ngeye una wo yundukila mu mpasi lumbu biabio biazingu kiaku.

Loma 8: 20.

18 Wau una kubutila mpanga ye nso-
lokoto, ye ngeye una dia titi biansi.

19 Una dia madia maku mu kiufuta kiazizi kiaku nate ye una vutuka mu ntoto uwabongwa. Kadi ngeye u fundu-fundu, una vutuka kala fundu-fundu.

Nk. 90: 3. 104: 29. Mpovi 3: 20. 12: 7.

Loma 5: 12.

20 Bakala diabika nkumbu ankazi andi Eva,¹ bu kena mbuti ababo bena moyo.

¹ mb. mvani amoyo.

3: 21—4: 24

21 Yave Nzambi wavangila Adami ye nkazi andi mvwatu miankanda miabulu, wabavwika.

22 ¶ Yave Nzambi wavova: Tala, muntu weka bonso umosi mu beto ye zeyi mambote ye mambi. Bwabu bika tuankakidila, mpasi kalambula koko kwandi ko ye bonga mu nti wamoyo mpe ye dia ye zinga mu ntangu yi ka yimani.

23 I kuma Yave Nzambi wamvaikisa mu lumbu lua Edeni, mpasi kasadila ntoto ukabongwa.

24 Yandi wavaikisa muntu, watula ku este dialumbu lua Edeni bakeluba ye sabala kieti lema, kisiukanga mwamonsono mu kenga nzil'anti wamoyo. Yel. 46: 10. Yeh. 1: 4. 10: 1.

SOCIEDADES BÍBLICAS UNIDAS